

漢武帝別國洞冥記
甄異
幽明
錄附校讎



甄

異

記

戴
祚
撰

中
華
書
局

甄異記

此據龍威秘書本
排印初編各叢書
僅有此本

甄異記

夏侯

南北朝 戴祚撰

譙郡夏侯文規亡後。見形還家。經庭前桃樹邊。過曰。此桃我昔所種。子乃美好。其婦曰。人言亡者畏桃。君何不畏耶。答曰。桃東南枝長二尺八寸向日者。憎之。或亦不畏也。

盧耽

昔有盧耽。仕州爲治中。嘗元會。至曉不及朝。化爲白鶴。至閣前。迴翔欲下。威儀以帶擲之。得一雙履。耽驚還就列。內外左右莫不駭異。時步隲爲廣州刺史。意甚惡之。便以狀聞。遂至誅滅。

陳濟

巴邛人陳濟者。作州吏。其妻獨在家。常有一丈夫。儀貌端正。着絳碧袍。采色炫耀。相期于一山澗間。至于寢處。不覺有人道相感接。比隣人觀其甫至。輒有虹見。

賈弼

賈弼夜夢。易其頭。翌日。人見皆驚。遂能半面啼。半面笑。

查道

待制查道奉使高麗。晚薄一山而止。望見沙中有一婦人。紅裳雙袒。髻髮紛亂。肘後微有紅鬚。查命水工以篙投於水中。勿令傷。婦人得水偃仰。復身望查拜手。感戀而沒。水工曰。某在海上未曾見此何物。查曰。此人魚也。能與人姦處。水族人性也。